

Xan Inaatel Pol laa sin no Galeisia

¹ Iaa, Pol, xan aposal Karisito. A xap xaa inaman gomsaa di na axilangi iaa ngali iaa ba tsap aposal, ma a xap xa taamat na tulen iaa bula. Oro, iaa adi abala tinaxaa ina aposal sin Iesu Karisito ma sin Moroaa iwaa xida Mom, iwaa ta atapaasi ia nan minet.

² Biaabi, iaa mii nugu no taamat lalon Karisito, giem atalaa abala laa sin gim, xan no mate-naaia Moroaa tia Galeisia.

³ Iaa atsuraa ngali amiimiilam ma malina na xaalame sin gim, biaa ta xaal sin Moroaa, iwaa xida Mom ma xida Orong Iesu Karisito.

⁴ A tali ia tsaa ngali xida no namaang tsaxa, ga gii mulangen gita sin abala ul tsaxa atalaa, amusili xan sirsiir xida Moroaa iwaa xida Mom.

⁵ Sin ia mu, biaa minaalam laaliu ma laaliu. Aso.

A xap xaa inesaait mamainaang xaatsap

⁶ Iaa suk tunga buxa sin sa, gim se es isagaa poroklii iwaa ta ilei gim, taman abia amiimiilam ta xaal sin Karisito, o gim ga putsii laa sin biexa inesaait mamainaang xaatsap,

⁷ biaa ta xap inesaait mamainaang so. Iaa paare weaatalaa amuina, biexaa inaman di se atangtangabaai gim, ma di se puxis atsaxati inesaait mamainaang ina Karisito.

⁸ Oro, nawe xa ina giem o xa angelo in balalan-git na baais taman xa inesaait xaatsap, ngen abia

giem tii baais taman laa sin gim, Morooa naba suk xororaa atsaxati ia laaliu.

⁹ Malen abia giem tii setauan paare, o talaawaa, iaa sebula paare nawe xa a baais taman xa inesaait xaatsap ngen abia gim ta se adi, Morooa naba suk xororaa atsaxati ia laaliu.

¹⁰ Oro iaa xap xonon ngali atatoni no inaman. Iaa saan ngali atatoni Morooa, oro, u sorowe iaa we ina atatoni no inaman? Nawe iaa se xosaraa abia, iaa ba xap tsap xan untutule Karisito.

Morooa a ilei Pol

¹¹ Nugu no taamat lalon Karisito iaa saan ngali gim na atii balawaa inesaait mamainaang iaa tii baais taman, a xap inaatalem taamat mu ta atsapngen.

¹² Iaa xap adi mu sin xa taamat gomsaa, o xa taamat tii asingan iaa taman, a xap, oro Iesu Karisito tii asen sin iaa.

¹³ Gim tii se alongmen nugu mat sen tino malen xadi namaang no Judaia. Iaa tii suk xaa tsaalen xan matenaanua Morooa ma iaa tii ga xonon ngali xosor atsoti.☆

¹⁴ Iaa tii suk rom leng buxa ngen biexaal ina no turan iaa sin nagiem nan ul lalon nagiem lotu no Judaia, ma iaa tii suk atik axaautsi nagiem no namaang no Judaia. Iaa tii suk amil puaa axaautsi xadi no asasing nagiem no iaaiiaa.☆

¹⁵ Oro Morooa tii inten tsaxali iaa lalon xan namaang axaau setauan tsaa sin di tii xap mager taxaana iaa. Tii ga ilei tsaali iaa sin xan amiimi-ilam.☆

☆ 1:13 1:13 Apo 8:3; 22:4-5; 26:9-11

☆ 1:14 1:14 Apo 22:3

☆ 1:15 1:15 Apo 9:3-6; 22:6-10; 26:13-18

¹⁶ Ma Moroaa ga suk taton ngali asen xan Tsi sin iaa, ngalibi iaa ba pupua ngali baais watwat taman ia labatina abia no Gentail. Iaa tii xap adi abala sinaae sin xaa inaman.

¹⁷ Biala bula, iaa tii xap laa lapalaa Jerusalem ngali lasi abia di, di tii no aposal setauan ngen iaa, oro iaa tii laa isagaa Arabia mil maaba iaa tii ga sebula mula xaalame Damaaskas.

¹⁸ Tii se tuul no miet tii se xap o iaa tii ga xaale lapalaa Jerusalem ngali laa lasi Pita,* ngali gelu ba etirikngen gelulu. Ma iaa tii ga manman mii, sin sangaul axuuk ma laa lima ina no leng.☆

¹⁹ Iaa tii xap lasi xa ina abia no Aposol, oro iaa tii lasi mu Jeims, iwaa turamasen Orong.

²⁰ Laamuaan no matan Moroaa iaa puris weaatalaa, no mat maarang iaa ta atatala no laa sin gim a xap no inaabaa.

²¹ Oro mil iaa ga laa lalon no inaman laba ta lua Siria ma Silisia.

²² Ma xan no matenaanua Moroaa tia Judaia, di tii taltaalnge sin Karisito, di tii xap atii iaa.

²³ Di tii alongmen inesaait we, iwaa taamat tii setauan xaa tsaalen gita, talaawaa a se babaais taman tinaalnge, biala tii ben we na xosor atsoti.

²⁴ Ma di tii ga pa'ii Moroaa ngali iaa.

2

No aposal di tii uk bal mii Pol

* **1:18 1:18** Pita - Biexa iesan Sepas. ☆ **1:18 1:18** Apo 9:26-30

¹ Mulina sangaul axuuk ma ga laa et ina miet, iaa sebula xaale lapalaa Jerusalem mii Banabaas, ma iaa ga giwaa bula Taitus.✧

² Iaa tii laa amusili abia luluba ma iaa ga alengi laamuaan di taman abia inesaait mamainaang, biao iaa tii baais labatina no Gentail. Oro iaa tii xosor axuina abala mii biao no lalaamua, amuina iaa tii mataa we nugu etsil naba soro maara gomsaa.

³ Ma ga so malen Taitus iwaa ta tsomi iaa, ia Gentail, di tii ga xap atuaai ia ngali na xasau.

⁴ Balawaa maarang tii tsap amuina biexaa no taamat ababaa, di tii tsiga xuxii amusili giem, ngalibi di ba matngen nagiem leiwaa, biao giem ta adi lalon Iesu Karisito, ngalibi di ba xosaraa giem malen no untutule sebula sin xan lo Moses.

⁵ Oro, giem tii xap sirawaa adokdoki so xadi no adodo ngalibi biao soina ina inesaait mamainaang naba manman mii gim.

⁶ Ma sin abia no lalaamua di tii adodo aloti di, di no sen mat laxen taamat. Di xap mat xaatsap lalon no mataaga. Morooa a xap ininte sin xida no namaang ina pakpak. Biao no inaman di tii xap paare taman xaa papaare papan nugu no tofore.

⁷ Oro Morooa tii taalnge tali abala inatalil sin iaa ngali baais taman inesaait mamainaang sin no Gentail, malen mu Pita tii xaa baais sin no Judaia.

⁸ Morooa, iwaa tii taxaa sin xan inatalil Pita iwaa xadi aposal no Judaia, iwaa mu uk Morooa tii taxaa sin nugu inatalil malen xadi aposal no Gentail.

⁹ No inaman di adodo ngali di na tali mangman-gle sin Jeims, Pita ma Jon. Detuu giwaa iaa ma Banabaas malen xadi no taamat so ngali taxaa mii di. Amuina di tii xilalaa biaa amiimiilam Moroaa tii tali sin iaa. Detuu siir ngali gelu ba laa sin no Gentail o di, di ba laa sin no inaman Judaia.

¹⁰ Detuu ningi gelulu ngali adodomi no muunwas. Biaa mu maarang iaa tii suk saan buxa ngali xosaraa.

Pol atutiki xan mamaet Pita

¹¹ Biaa Pita tii xaalame Antiok, iaa tii ga til laamuaan, ma iaa ga asaait banbanti ia, amuina tii xosaraa namaang tsaxa.

¹² Setauan tsaa biexaa untaltaalnge in Judaia di tii xaal sangan Jeims, Pita tii xaa angangen etudim mii no Gentail. Oro biaa di tii xaalame, Pita a sebula mula ma man palaaen abia no Gentail. Amuina a mataa sin abia no inaman di ta xaal sangan Jeims di ta til watwat sin xadi namaang ina xasau.

¹³ Biexaa Jiu, di tii tsomi ia, sin xan no namaang ina inaabaa, ma sin abia a xosaraa Banabaas tii ga sebula laa palaaen sal.

¹⁴ Biaa iaa tii lasi we, di tii xap amusili sal ina totore so ina inesait mamainaang, iaa ga asaaiti Pita papan no matan di se araraa, iaa ga we, "Pita iu Judaia, oro u manman malen no Gentail, u xap manman malen xa Jiu. Asen parawe ma u ga atuaai no Gentail ngali amusili xadi namaang no Jiu."

Tinaalnge mu sin Iesu u ba tsap taamat tutiik

¹⁵ “Di taxaana giem no Jiu ma a xap giem no Gentail, biao no untsaxa.

¹⁶ Gim atii we, xa taamat a xap tsap tutiik lalon no matan Morooa sin amumusili xan no lo Moses oro sin tinaalnge mu sin Iesu Karisito. Ma gim bula, gim na aturungi nagim tinaalnge sin Iesu Karisito ngali gim ba tsap tutiik laamuaan Morooa taman tinaalnge sin Karisito. Gim ba xap tsap tutiik sin amumusili lo, malen mu, gim se taalnge amuina a xap xa na tsap tutiik lalon no matan Morooa nawe amusili lo.

¹⁷ “Gita tsatsel ngali tsap tutiik lalon no matan Morooa, amuina gita se man lalon Karisito. Oro nawe naba tsap lengleng we gita tsaa no inaman tsaxa, biaabi, gita ba we Karisito a laamuangen gita ngali xosaraa namaang tsaxa? Asuk xap, naba xap weaatia.

¹⁸ Nawe iaa xosor mulangena no namaang biao iaa tii xosor atsoti no, iaa asen iaa tsaa malen iaa unlaklaxe lo.

¹⁹ Xan no lo Moses atutali iaa we, iaa na suk met, biaabi iaa ga met sin watwat ina abia no lo, ngalibi iaa ba soro tino ngali Morooa.

²⁰ Iaa tii se ilua papan tongol mii Karisito. Ma a xap bula iaa tsaa iaa tino, a xap, oro iwaa Karisito a tino lologo. Balawaa tino iaa tii manman sin abala pakpak, iaa manman taman tinaalnge sin xan tsi Morooa, iwaa tii titii iaa, tii ga tali ia tsaa ngali iaa.

²¹ Iaa xap aturunglii xan amiimiilam Morooa, amuina nawe namaang tutiik naba tsap sin amusili lo, naba malen Karisito a met gomsaa mu.”

3

Tinaalnge o amusili lo

¹ Ai, gim no Galeisia gim no tangtangabaa so, a malen xa a se lii xa makmaxar tsaxa papan gim! No totore ina xan minet Iesu Karisito papan tongol, tii se tsap nan waa lalon no matan gim.

² Maarang mu ta xuuk, iaa ta saan ngali atii na xaal sin gim, aweaatalaa, Nantanuaan Moroaa tii tsigaii gim ngali sa, ngali amumusili xan no lo Moses o, sin gim ta taltaalnge sin senaara gim ta longmien?

³ Gim no tangtangabaa so taa? Gim se atiltsoli nagim tino uul mii Nantanuaan Moroaa, asen parawe gim ta we gim na araraai nagim tino taman nagim no watwat tsaa?

⁴ Balawaa no mamaet ta tsaptsap sin gim atsap gomsaa no, ngaa? A xap, iaa adodo we a xap tsap gomsaa no.

⁵ Asen parawe o Moroaa tii ga tali Nantanua iwaa tii atsapngen no axixila xoror labatina gim. Tii tali ngali gim tii amil puua abia lo? O amuina sin gim tii taltaalnge sin abia inesaait mamainaang gim tii longmien?

⁶ Aweaatia bula sin Abaram. Xan inaatel Moroaa tii paare weaatala, *“Abaram tii taalnge sin Moroaa ma Moroaa tii ga saansili xan tinaalnge Abaram, malen tii suk tutiik.”*✠

⁷ Biaabi gim na leng axaau malen biao di, di tii se adi tinaalnge so, di xan no tsi so Abaram.

⁸ Inaatel Pat tii se paare tsaa ti laamua weaatalaa, Moroaa naba atutiki no Gentail ngali di na

tutiik sin tinaalnge lalon Karisito. Ma biao xan inesaait axaau Abaram di tii se baais taman no weaatalaa, *"No inaman labalaba araraa iaa ba atubudaani amuina sin iu."*☆

⁹ Lowas, biao no inaman di ta ie tinaalnge, di se adi tubudaan malen Abaram iwaa untinaalnge.

¹⁰ No inaman araraa di ta adodo watwat ngali amumusili xan no lo Moses, di tii man paina xoror tsaxa. Amuina xan inaatel a paare weaatala, *"No sa di tii xap tigiri amusili no namaang araraa di tii atalaa lalon Buk ina Lo, xoror tsaxa a manman papan di araraa."*☆

¹¹ Asuk xap xa na tsap tutiik lalon no matan Morooa sin amumusili lo amuina, *"no inaman tutiik di ba tino mu sin tinaalnge."*☆

¹² Biaabi lo a xap axoxos papan tinaalnge. *"Oro biao di, di ta saan ngali amusili lo, di na suk amil axaautsi abia no lo."*☆

¹³ Karisito tii gii mulangenai gita, sin xoror tsaxa ina lo. Sal ngali atutiki abia, ia tsaa atsaxei xida no mamaxet. Inaatel a paare weaatala, *"Tsaxa a laa sin no saa taamat di tii ataxiwaa di papan ie tiltil."*☆

¹⁴ Biaabi Iesu Karisito tii ga weaatia bula, ngali Morooa naba tabali no Gentail taman abia tubudaan Morooa tii tabali Abaram taman, ma gita bula biao gita tii taltaalnge, gita tii se adi iwaa Nantanuaan Morooa tii se xubu tali sin gita.

Lo ma xuxubu

¹⁵ Nugu no taamat iaa ba tore puapua taman xida no mat namaang weaatalaa, a xap xa na

☆ **3:8 3:8** Til 12:3; 18:18; 22:18 ☆ **3:10 3:10** Dut 27:26 ☆ **3:11 3:11** Aba 2:4 ☆ **3:12 3:12** Lew 18:5 ☆ **3:13 3:13** Dut 21:23

pupua ngali puxislil o paare papan xa xuxubu no inaman di tii se siir taman ma di tii ga se atsapngen.

¹⁶ Morooa tii tali no xuxubu sin Abaram ma xan no utmilmil. Biaa inaatel a xap paare we, “a laa sin num no utmilmil,” muina a we, no daan inaman. Oro, balawaa totore a paare laa sin taamat ta xuuk mu, biaa ta we, “num utmilmil,” muina abia, aweaatalaa, axuuk taamat mu, iwaa Iesu Karisito.

¹⁷ Muina nugu papaare abala, Morooa tii xosaraa xuxubu mii Abaram setauan o mulina 430 ina miet, tii ga tali lo sin Moses, a xap saali abia xuxubu, oro Morooa tii se sirawaa Abaram taman. Biaabi lo a xap pupua ngali saali biaa xuxubu Morooa tii se xubatsi.

¹⁸ Nawe biaa no tapkina atsap paina lo, naba se xap bula xaka watwat abia xuxubu, oro Morooa sin xan amiimiilam tii taal gomsaai abia no tinabel sin Abaram amuina tii xosaraa abia xuxubu.

¹⁹ Xan sen tinaxaa abala lo? Tii tsap no amuina ngali asen no namaang tsaxa, til sin xan utmilmil Abaram naba tsap. Biaa xuxubu naba tsap sin iwaa utmilmil Morooa tii se axilangi. Morooa ga tulen no angelo taman lo ngali tali sin Moses, o Moses tii ga tali laa sin no inaman, malen unmalina lolobet ina Morooa ma no inaman.

²⁰ Iwaa unmalina lolobet na suk xonon ngali atatoni biaa lo taamat ta til lolobet ina delulu. Oro, Morooa axuuk mu ma a ie watwat ngali xosaraa no maarang ia xasinge, ma naba xap saan ngali xa unmalina lolobet.

²¹ Biaabi, balawaa xan no lo Moses, a epuske mii xan xuxubu Morooa ta? Asuk xap! Oro nawe

Moroaa a tali xan no lo biaa ta pupua ngali tali tino laaliu, biaabi Moroaa nii se lasi malen di tutiik sin di ta amusili biaa no lo.

²² Oro, Inaatel Pat asaait leng weaatala, xolkol-moxo ina inaman araraa, atsap xaus ina namaang tsaxa. Ngalibi Moroaa naba tali sin abia di, di tii taalnge sin Iesu Karisito, ma no maarang tii se xubu tali sin di. Ma naba tali weaatia amuina di tii taltaalnge.

²³ Ti sin balawaa tinaalnge tii tsap, no lo tii ros ariiti gita ma ga tilkaali gita le pupua sin tinaalnge tii se le tsap lengleng.

²⁴ Biaabi balawaa no lo, tii tilaamamil mu sin gita, ga laamungen gita laa sangan Karisito, ngalibi Moroaa naba lasi malen gita tsap tutiik sin tinaalnge.

²⁵ Talaawaa tinaalnge tii se xaalame ma gita tii se xap bula man paina xan tilaamamil lo.

Xan no tsi Moroaa

²⁶ Gim araraa xan no tsi Moroaa amuina gim tii ie tinaalnge sin Iesu Karisito.

²⁷ Ma gim araraa gim tii se axaxadaan lalon Karisito, ma gim tii se tsap xuuk lalon ia, a malen gim tii se ruserusa tsaa taman Karisito.

²⁸ Lalon Iesu Karisito, gim xuuk araraa, a xap xa Jiu o xa Gentail, a xap xa untutule o xa leiwaa, a xap xa taamat o xa aina.

²⁹ Nawe gim xan no inaman Karisito, biaa gim xan no utmilmil Abaram ma gim ba tapkina no tinabel Moroaa tii se xubu tali.

4

¹ Sen maarang iaa ta wena paatina aweaatalaa; nawe iwaa tsi adokdok tsaa, iwaa tsi naba tapkina abia xan no mat maarang sin xan mom milmaaba. Oro, talaawaa ta dokdok, a malen xa untutule.

² Iwaa tsi dokdok a manman tsaa paina xan tilaamamil abia di, di ta tilaamamil sin ngali lolong amusili di, til sin leng xan mom naba ta xap xosaraa ia malen a xap untutule bula.

³ Ma gita bula, biala gita tii dokdok gita malen tsixi dokdok, gita tii lolong amumusili no matlaxen namaang ina abala xolkolmoxo malen no untutule.

⁴ Oro biala leng so a se tsap mii xan adodo Moroaa ga tulen xan tsi, ma aina tii ga taxaana paina xan watwat xan no lo Moses.

⁵ Ma ga gii tsaxali abia di paina lo. Ngalibi Moroaa naba xosaraa gita xan no tsi so.

⁶ Gim se xan no tsi Moroaa, biaabi Moroaa ga tulen Nantanuaan xan Tsi laa lalon xida no butsa, ma talaawaa gim ga pupua ngali ilei Moroaa malen nagim xos so ma gim ga we, "O Mom, nugu Mom."

⁷ Biaabi, gim xap no untutule bula, gim se xan no tsi Moroaa, biala no tinabel araraa biala xan no Moroaa, gim se adi abia xuxubu malen gim ba se tapkina no.

Xan xariin adodo Pol ngali no Galeisia

⁸ Ti laamua sin gim tii xap mager atii Moroaa, gim tii no untutule sin no matlaxen inaabaa ina orong, di ta xap no orong so.

⁹ Talaawaa gim se atii Morooa, iaa ba paare weaatalaa, Morooa tsaa a se atii gim, o ngalisa gim ta sebula mula laa sin abia no matlaxen lo dokdok ina abala xolkolmoxo ta xap watwat no? Gim saan ngali tsap no untutule sin no lo araraa sebula?

¹⁰ Gim xaa adodo aloti xadi no xaraxin leng no Judaia ma no uleng, ma no leng ina no luxaal ma no miet.

¹¹ Iaa suk mataa malen biaa nugu no tinaxaa iaa ta xosaraa lolobet ina gim, a se laa maarang gomsaa no.

¹² Iaa ningi gim, nugu no taamat lalon Karisito, gim na tsap malen iaa, amuina iaa tii malen mu gim. Gim tii xap xosaraa xaa namaang na tsaxa susugu.

¹³ Ma gim se leng we iaa tii maramase sin nugu nanaaxuuk ina babaais taman inesaait mainaang laa sin gim.

¹⁴ Ma ga so, biaa nugu maramase tii tali xonkonon sin gim, ma gim tii xap ngutsulen iaa ma gim tii xap taaltalu sin iaa. Oro, gim tii suei iaa taman tataton malen iaa tii xa ina xan no angelo so Morooa o Iesu Karisito.

¹⁵ Ti gim tii suk xaa taton! Inaabi se abia nagim no tataton? Iaa suk paare leng ngali tiltsomi nugu minet, gim nii se luapeli no xeltsen matan gim, ma gim na tali no sin iaa, nawe nii pupua.

¹⁶ O talaawaa iaa se tsap nagim matenkorot amuina iaa tii papaare taman soina?

¹⁷ Biexaal ina xida no taamat ababaa, di xonon ngali adaani gim laa sangan di taman xaraxin watwat. Oro biaa di, di ta atalem weaatia, di xosaraa namaang tsaxa. Di saan ngali tilbanti

gim sin amusili giem ngalibi gim ba suk amusili di.

¹⁸ Ma na axaau ngali xaal di na laamuangen gim taman watwat nawe di saan ngali tiltsomi so mii gim. Ma nawe iaa xap manman mii gim o xaal di saan ngali di na tiltsomi mii gim weaatia, lowas, biala asuk axaau bula.

¹⁹ Nugu no xos! Iaa sebula saanen xaraxin sosong ngali gim, malen aina ta taxaa tsi, ma iaa ba tigiri saanen tsaa, til sin Karisito naba ta tsap lot lalon nagim tino.

²⁰ Iaa suk saan ngali iaa na manman mii gim talaawaa ma iaa nii xap saan ngali totore watwat sin gim weaatia. Oro iaa se lolbiir weaatia amuina iaa ba se xosaraa sa ngalibi naba axaau ngali gim?

Totore puapua ngali Aga ma Sera

²¹ Biexaal di asaaiti iaa we, gim saan ngali manman paina xan watwat lo. Gim leng sin no maarang xan lo Moses ta asaait taman? Iaa a xap adodo weaatia.

²² Inaatel a weaatia, xan no tsi Abaram alua. Axuuk untutule aina a taxaana o iexa, aina ta leiwaa a taxaana.

²³ Iwaa xan tsi Abaram sin aina untutule, atsap amusili xadi adodo no inaman mu, oro iwaa xan tsi aina leiwaa atsap amuina sin xan xuxubu Moroa.

²⁴ Balawaa lo aina delulu no puapua ina no xuxubu ta lua. Axuuk ina xuxubu axaal papan Buk Sinai ma ga tali no tsi biala di ba ta tsap no untutule. Iwaa aina, ilaa Aga.

²⁵ Aga, a til axilangi Buk Sinai biao ta manman Arabia ma ga malen Jerusalem in atalaa, amuina ia mii xan no tsi di manman paina lo ina namaang ina untutule.

²⁶ Oro, biao Jerusalem tade lapalaa asuk leiwaa, ma ia xida nagaa.

²⁷ Inaatel Pat aweaatalaa:
 “U na taton, iu aina,
 u ta xap taktaxaa tsi;
 u na xuup lot taman resres,
 u ta xap saaeen xa sosong ina taktaxaa tsi;
 amuina axuduxudu buxa xan no tsi aia aina xan
 maxis ta se papaalii
 ngen xan no tsi aia aina ta ie maxis.”✧

²⁸ Talaawaa, gim nugu no taamat, gim malen Aisak iwaa xan Sera. Gim xan no tsi Morooa amuina tii se xubatsi weaatia.

²⁹ Sin abia no leng, iwaa tsi Aga ta taxaana sin namaang ina pakpak, a xaa ngutsulen aia tsi Sera ta taxaana sin xan watwat Nantanua Pat. Talaawaa, biao namaang a manman tsaa.

³⁰ Oro Inaatel Pat asen paare we? *“Na saali aia aina untutule mii xan tsi, amuina xan tsi aina untutule naba suk xap exasen no tinabel biao delu tii momtsoli mii xan tsi aina leiwaa.”*✧

³¹ Biaabi nugu no taamat, gita xap xan no tsi aina untutule, a xap, gita xan no tsi aina ta leiwaa.

5

Karisito a se aleiwaa gita

¹ Karisito a se luba aleiwaa gita sin xan no lo Moses ngali gita ba leiwaa sin no xoror tsaxa ina

lo. Biaabi, gim na suk til watwat atia ma gim nangaam papaalii no lo na rosriiti gim sebula.

² Gim na lolong! Iaa Pol, iaa paare sin gim weaatalaa, gim nangaam papaalii xaal ngali di na axasaui gim amusili xan no lo Moses, amuina Karisito naba xap pupua ngali inten gim malen gim tutiik lalon no matan.

³ Gim na tilaamamil sin gim xuxuuk, nawe gim poroklii di ngali di ba axasaui gim ngali tsap tutiik lalon no matan Morooa, gim na suk amusili araraai abia no lo.

⁴ Gim, biao gim ta xonon ngali amumusili no lo, malen gim tsap tutiik lalon no matan Morooa, biao gim se atsiplii gim sin Karisito. Gim se xol palaaen abia amiimiilam.

⁵ Oro taman tinaalnge gita liliis adamis lalon namaang tutiik ina Nantanua.

⁶ Amuina lalon Iesu Karisito nawe xa a xasau o a xap xasau, balawaa a xap tilbanti xida manman lalon Iesu Karisito. Maarang ta lot mu, tinaalnge lalon titii.

⁷ Gim lo solsol lalon abia etsil axaa. Saa ia tii tsigaii gim ma gim ga xap long amusili abia soina?

⁸ Biao no mat adodo a xap xaal sin aia xa ta ilei gim.

⁹ Malen xa pu iis dokdok a pupua ngali apupuati abia palawa xiduul. Muina abala a we, xa pu asasing dokdok ta xap so a pupua ngali asing atsoti no daan inaman.

¹⁰ Iaa taalnge sin Orong malen gim ba xap longmien xadi xaa totore no inaman xaatsap. Oro iwaa xa ta xap amusili nugu no totore, Morooa

naba tali iliil tsaxa sin aia xa tii atangtangabaa
gim taman no mat totore ta xap so.

¹¹ Nugu no taamat, ne iaa babaais tsaa taman xaskasau, ngalisa biao gita no taamat, no undadare di ta ngutsulen tsaa iaa? Nawe a weatia, nugu totore taman xan tongol Iesu naba xap teng axaau mu sin xadi no lolong.

¹² Ma asen parawe sin abia di ta babaais ngali axasau biexaal, di tsaalen bula nagiem no tinaalnge. Ma ne di adodo we biao namaang ina xasau axaautsi di, amale di na xap axasau xa xolot dokdok ina di, a xap, naba axaau ngali di na suk patsali araraai di.

¹³ Gim, nugu no taamat, Morooa tii se axilangi gim ngali gim ba leiwaa sin amumusili xan no lo Moses. Oro, gim nangaam xosaraa biao leiwaa ngali amaasi nagim no namaang tsaxa. Biao mu gim na xosaraa abia leiwaa ngali til etudim mii gim araraa lalon abia xan titii Morooa.

¹⁴ Biao xan no lo Moses araraa a pupua ngali naba tsap axuuk lo mu, *“U na titii no turaam atataaen iu malen u ta titii iu tsaa.”*[☆]

¹⁵ Nawe gim lo emagaae ma esas ngen gim, gim na tilaamamil, o ne a xap, gim ba soro sas amantei gim tsaa.

Tino lalon Nantanua

¹⁶ Ma iaa ga we gim na eses lalon Nantanua, ngali gim ba xap xosor puua biao no sasaae ina abala pakpak.

¹⁷ Na ba tsap malen abia, sinsa biao no sasaae tsaxa ina pakpak asuk xaatsap buxa sin xan

[☆] 5:14 5:14 Lew 19:18

sasaae Nantanua. Ma Nantanua naba saan ngali no maarang ta suk xaatsap ngen no sasaae tsaxa ina pakpak ta saan ngali no. Delu tigiri epuske engen delulu ngalibi gim ba xap saan ngali xosaraa sawe ta mamainaang, gim ta saan ngali xosaraa.

¹⁸ Oro nawe xan Nantanua Morooa alaamuan-gim, gim ba xap manman paina xan no lo Moses.

¹⁹ No mat namaang tsaxa nan abala pakpak aman mu lalon waawaa, namaang ngali matul mii xa u ta xap maxis sin, namaang ta pun, ma no mat laxen namaang ina minaxis ngali matul ta xap tutiik,

²⁰ langlangaari laa sin morooa ababaa, unmak-maxar, ngungus, puris, bal tsaxa, unmakmagaa, angen tso, a xap xa xuuk bal, tsekkirixi di,

²¹ mataxaaxaa, gogo taman daan watwat, gogo ma ngong, mii biexaa namaang tsaxa. Iaa tii se atewaai gim tsaa ma talaawaa iaa sebula tore watwat sin gim weaatala, biao di, di ta manman taman abala no mat namaang, di ba xap tapkina xan Maradaan Morooa.

²² Oro balawaa se, no waawaan Nantanua. Titii, tataton, malina, liliis adamis, titii, mat mak axaau, namaang so ngali taalnge,

²³ mangmagus, ma arongi. Asuk xap xa lo naba pupua ngali tilbanti abala no namaang axaau.

²⁴ Biao di xan no Iesu Karisito, xadi no namaang tsaxa ina pakpak tii se ataxiwaa araraa no papan tongol.

²⁵ Nawe xan Nantanua Morooa a tali tino uul sin gita, gita na suk amusili so mu xan adodo Nantanua.

²⁶ Gita na xap paraak ma alelep bal ngali atapaasi mamaxet ma tseksirixi ngen gita, ma gim na xap mataxaaxaa sin xadi no maarang no inaman.

6

Xosaraa namaang axaau sin no inaman araraa

¹ Nugu no taamat, nawe xa a atsinaa lalon xa namaang tsaxa, gim biao gim ta us taman Nantanua gim na le gii adamisi ia mula. Gim bula gim na tilaamamil sin gim tsaa o no xonkonon naba soro xonon gim.

² Gita na alet engen xida no mamaxet, o nawe gim xosaraa weaatia, gim ba xosor puua xan lo Karisito.

³ O nawe xa, adodo we, ia taamat lot so, sin ia ta taamat gomsaa mu, xan adodo apanaai ia tsaa.

⁴ Oro xuxuuk ina gita araraa na suk asoi xan namaang axaau tsaa, ngali ia tsaa naba pupua ngali paraak taman ia tsaa, ma naba xap pupua ngali apuaa ia mii xa xaatsap.

⁵ Amuina gita xuxuuk gita ba atsaxei xida no mamaxet tsaa ngali xida no namaang.

⁶ Nawe xa alet inanaa lalon xan totore Morooa, axaau na exasen abia xan no maarang axaau bula mii xan unaasasing.

⁷ Gim nangaam apanaai gim tsaa. Morooa a xap ngali reret sin gim, amuina senaara gim ta soxaa gim ba adi tsaa waawaan.

⁸ Nawe saa ia ta wena amusili namaang tsaxa naba adi tsaa waawaan ina namaang tsaxa biao minet laaliu. Oro saa ia ta wena amusili namaang ina Nantanua naba adi tino laaliu sin Nantanua.

⁹ Gita na xap pelmet sin xoxosaraa no namaang ta axaau; gita ba paaski waawaan, sin abia leng so naba ta tsap nawe gita xap pelmet.

¹⁰ Biaabi, biao gita ta pupua tsaa ngali xosaraa namaang axaau sin no inaman araraa, gita na xosaraa weaatia. Oro, xariin maarang mu, gita na xosaraa namaang axaau sin abia xadi mate-naanua no taltaalnge.

Xasau a maarang gomsaa oro tino uul lalon Karisito biao maarang so

¹¹ Gim lasi, taman no limaaga tsaa iaa atatal lot laa sin gim.

¹² Biao no inaman, di ta saan ngali mat axaau sin biexaal, di tii xonon ngali atuaai gim ngali xasau, amuina di xap saan ngali no Jiu di na taal sosong sin di, ngali xan tongol Karisito.

¹³ Asuk xap xa ina abia no inaman di tii se xasau, di xaa amumusili no lo. Oro, di saan mu ngali di na axasaui gim ngali di ba paraak sin biexaa inaman Judaia taman no isuaan gim.

¹⁴ Asuk so maase, iaa na suk xap paraak gomsaa taman no isuaan iaa, oro iaa na paraak mu taman xan tongol xida Orong Iesu Karisito. Papan tongol Iesu tii se met poroklii abia no namaang ina xolkolmoxo, ma biao no namaang tii se papaalii iaa.

¹⁵ Ma nawe di axasaui gita o a xap, biao maarang gomsaa mu. Oro xaraxin maarang mu, gita na tsap taamat uul lalon Karisito.

¹⁶ Ma biao di, di ta eses mii nugu totore, iaa atsuraa Morooa ngali tali malina ma biirbirum

sin di ma sin no Israel* di ta ie tinaalnge, biao di xan no Morooa.

¹⁷ Sin xapkap ina se, iaa suk palo ngali xa na amagaai iaa, amuina balawaa no balak sin no isuaaga asen malen, iaa xan Iesu.

¹⁸ Nugu no taamat lalon Karisito, iaa sawit malen biao amiimiilam sin xida Orong Iesu Karisito, na manman mii Nantanuaan gim. Aso.

* **6:16 6:16** Tore puapua ngali xan no tinaalnge Morooa.

Inesaait Mamainaang Laa Sin Notsi
The New Testament in the Notsi language of New
Ireland Province, Papua New Guinea

Copyright © 2024 Wycliffe Bible Translators, Inc.

Language: (Notsi)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-14

PDF generated using Haiola and XeLaTeX on 14 Aug 2025 from source files dated 14 Aug 2025

601480e7-130d-5189-be42-9e43a92dbdde